



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM

Komisija za ljudska prava, imigraciju, izbjeglice i azil

Broj: 01/5-011-162/02..

Sarajevo, 26. februara 2002.

Z A P I S N I K

sa 13. sjednice Komisije za ljudska prava, imigraciju, izbjeglice i azil,
održane 26. februara 2002. godine

Trinaestoj sjednici prisustvovali su Osman Brka, Miloš Jovanović, Miro Grabovac, Bahrija Osmanović, Mustafa Cuplov, Violeta Kamberović i Omer Filipović. Odsustvovali su Dušan Stokić i Franjo Majdandžić.

Sjednici je prisustvovao gospodin Leon-Diaz Francisco Javier, viši pravni svjetnik u OSCE-u za institucije ljudskih prava.

Predstavnik Vijeća ministara nije prisustvovao sjednici, iako je uredno pozvan.

Za sjednicu je jednoglasno usvojen sljedeći

D N E V N I R E D:

1. Razmatranje Prijedloga zakona o pravima nacionalnih manjina u Bosni i Hercegovini (predlagači poslanici Mariofil Ljubić, Miro Grabovac –Titan, Zdenko Vukić, Marko Amidžić i Mirko Baković),
2. Razmatranje Prijedloga zakona o zaštiti prava nacionalnih manjina (predlagač Vijeće ministara BiH) i
3. Tekuća pitanja.

Ad – 1 i 2:

U uvodnom izlaganju predsjedavajući Osman Brka, pored ostalog, rekao je da se u proceduri u Predstavničkom domu nalaze dva prijedloga zakona o pravima nacionalnih manjina, koji su danas na dnevnom redu sjednice. S obzirom da je prijedlog Kluba poslanika HDZ-a ranije dostavljen Parlamentu, Komisija je na 11. sjednici odložila razmatranje istog jer je u to vrijeme stigao i prijedlog Vijeća ministara. Tada je na sjednici sugerisano da se predlagači oba zakona sastanu i pokušaju izaći sa jednim prijedlogom zakona. Dalje je rekao da su Komisiji iz OSCE-a dostavljeni komentari Venecijanske komisije na Prijedlog zakona Vijeća ministara, koji su dostavljeni članovima Komisije. Nakon toga se desilo da je Venecijanska komisijaaa pozvala parlamentarnu delegaciju u Pariz 01. marta, gdje će se održati konferencija u vezi s

nacionalnim manjinama i dobiti pomoć za izradu kvalitetnog zakona. Rekao je da je na tu konferenciju pozvan i on kao predsjedavajući Komisije.

Iz ovog razloga predsjedavajući je predložio da Komisija danas o ovim prijedlozima zakona ne vodi raspravu i ne zauzima stav dok se ne vrati spomenuta parlamentarna delegacija sa te konferencije. Rekao je da će on po povratku iz Pariza Komisiji prezentirati rezultate sastanka i na osnovu toga odrediti aktivnosti Komisije u vezi s ovim zakonima. Predložio je da gospodin Havier ukratko iznese svoje prijedloge i sugestije.

Prije izlaganja g. Haviera članovi Komisije Omer Filipović, Bahrija Osmanović, Mustafa Cuplov i Violeta Kamberović postavili su mu određena pitanja. Potom je gospodin Francisko Havier u svom izlaganju obrazložio stavove Venecijanske komisije rekavši da je i sam učestvovao u njenom radu. Odgovorio je na pitanja postavljena od strane članova Komisije. Pored ostalog, rekao je da se komentari odnose na Prijedlog zakona Vijeća ministara koji je ranije bio u proceduri, ali da je upoređivanjem novog teksta zakona uvidio da se isti komentari odnose i na ovaj jer mu je ostala ista struktura. Rekao je da Venecijanska komisija nije imala na uvidu prijedloge Kluba poslanika HDZ-a niti Ibrahima Spahića, te da će se o njima izjasniti nako sastanka u Parizu.

Poslije izlaganja predstavnika OSCE-a Komisija je zaključila da se odgodi rasprava o predloženim zakonima, a da predsjedavajući, nakon sastanka u Parizu, zavisno od njegovog rezultata, sazove sjednicu Komisije.

Ad – 3: Tekuća pitanja

Pod tekućim pitanjima predsjedavajući Osman Brka predložio je dva pitanja:

- a) Organizacija posjeta Komisije određenim mjestima,
- b) Definitivan dogovor o organizaciji okruglog stola

a) U vezi sa posjetama Komisije predsjedavajući je podsjetio na zaključak sa prethodne sjednice, da se u toku godine izvrši 4-6 posjeta. Predložio je da ostanu iste grupe koje su bile prilikom posjeta u prošloj godini. Iznio je svoj prijedlog da se posjeti Srebrenica, Bijeljina i Janja, a članove Komisije pozvao da predlože mjesta za koja smatraju da ih treba posjetiti.

Mustafa Cuplov predložio je da se posjeti Dolina Neretve – Stolac, Ravno, Žitomislić i druga mjesta zaključno sa Čapljinom.

Miloš Jovanović je predložio da se izvrši posjeta Zenici i Bihaću, na što je predsjedavajući zamolio da se uzmu mjesta koja su geografski povezana radi praktičnih razloga.

Poslije kraćih diskusija i usaglašavanja zaključeno je sljedeće:

1. da se organizuju tri grupe od po tri člana Komisije koji će izvršiti posjete, kako slijedi:

prva grupa u sastavu: Osman Brka, Violeta Kamberović i Miloš Jovanović – da izvrše posjetu Srebrenici, Bijeljini i Janji;

druga grupa u sastavu: Miro grabovac – Titan, Mustafa Cuplov i Bahrija Osmanović – da posjete Dolinu Neretve – Stolac, Ravno, Žitomislić – i druga mjesta, zaključno sa Čapljinom;

treća grupa u sastavu;; Omer Filipović, Dušan Stokić i Franjo Majdandžić, da posjete Grahovo, Petrovac, Bihać i Martin Brod.

2. Posjete će se izvršiti od 25. do 31. marta 2002. godine.

b) Predsjedavajući Osman Brka je predložio da Komisija konačno zauzme stav u vezi s organizovanjem okruglog stola. Podsjetio je Komisiju na dosadašnje aktivnosti , kao i na to da je Kolegij organizaciju okruglog stola prepustio Komisiji da taj skup organizuje u skladu s svojim poslovnim ovlaštenjima.

U diskusiji povodom ovog pitanja učestvovali su Miro Grabovac, Osman Brka, Mustafa Cuplov i Miloš Jovanović.

Poslije diskusije zaključeno je da se ispred Komisije uputi zahtjev rektorima univerziteta u Sarajevu, Bihaću, Tuzli, Banjoj Luci, Srpskom Sarajevu, Univerzitetu "Džemal Bijedić" u Mostaru i Sveučilištu u Mostaru, da predlože po jednog člana sa univerziteta u organizacioni odbor radi organizovanja okruglog stola.

U okviru ove tačke Violeta Kamberović je postavila pitanje teškog položaja Roma u Bosni i Hercegovini. Naglasila je da su oni izloženi diskriminaciji u svim segmentima života. Predložila je da Komisija razmotri ovo pitanje kako bi se vidjelo šta bi se moglo učiniti na poboljšanju njihovog stanja.

Bahrija Osmanović ponovo je postavila pitanje narušavanja ljudskih prava u oblasti rada, naglasivši da ima veoma mnogo slučajeva gdje ljudi rade na crno, pri čemu im se ne plaćaju ni penzijsko ni zdravstveno osiguranje, a na drugoj strani su oštećeni fondovi zbog neplaćanja obaveznih doprinosa.

Predsjedavajući je rekao da se slaže da postoje problemi koje su gospođe iznijele i da su veoma izraženi. Međutim, rekao je da, nažalost, Komisija nema instrumenata da ta pitanja riješi. Zato je iznio stav da nije za to da se na dnevni red stavljaju pitanja za koja se unaprijed zna da ih Komisija ne može riješiti. Naglasio je da su ova pitanja u nadležnosti izvršne vlasti i da bi ih oni trebali rješavati.

Ovim je završena 13. sjednica Komisije.

Sastavni dio ovog zapisnika je transkript 13. sjednice Komisije.

SEKRETAR KOMISIJE
Rajka Stanišić

PREDSJEDAVAJUĆI KOMISIJE
Osman Brka